



Äntwert vum Minister fir Ëmwelt, Klima an Biodiversitéit op d'parlamentaresch Fro n°3605 vum 5. Februar 2026 vum éierewäerten Deputéierten Här Michel Lemaire iwwert d' "Mise en oeuvre de la directive-cadre sur l'eau au Luxembourg"

1. Wéi eng konkret finanziell oder juristesch Risike gesäit d'Regierung aktuell am Kader vum lafenden „Vertragsverletzungsverfahren“, falls d'Ziler am Beräich vum Gewässerschutz och weiderhin net erreecht ginn?

Déi aktuell formell Infraktiounsprozedur INFR(2025)2216 beriffet sech op eng net korrekt Transpositioun vum Artikel 11 (3) vun der Direktiv 2000/60/CE, a net op d'Erreeche vun den Ziler am Beräich vum Gewässerschutz. D'Europäesch Kommissioun verlaangt méi e konsequente legislative Kader fir kënnen Geneemegungen am Beräich vun der Entnam vu Grond- an Uewerflächewaasser souwéi de punktuellen Aleedungen (Rejets) an d'Gewässer unzepassen. Den Oflaf vun enger Infraktiounsprozedur ass an den Artikelen 258 a 260 vum Traité iwwert d'Aarbechtsweis vun der Europäescher Unioun geregelt. D'Regierung wäert am Delai vun 2 Méint op d' "Mise en demeure" vun der europäescher Kommissioun äntweren.

2. Wéi erkläert d'Regierung, datt Lëtzebuerg d'Ziler vun der „Wasserrahmenrichtlinie“zanter iwwer zéng Joer verfeelt, ouni datt bis haut wierksam strukturell Korrekturen duerchgesat goufen?

D'Erreeche vun den Ziler vun der Waasserrahmenrichtlinn ass zu Lëtzebuerg duerch eng Rei strukturell a geographesch Spezifitéiten besonnesch komplex. Lëtzebuerg läit op der Waasserscheed tëscht den Anzuchsgebieder vu Meuse a Rhäin, wat dozou féiert, datt d'Gewässer dacks kleng an eng staark Waasseroflafdynamik hunn. Déi vill kleng Waasserwierker reagéieren dofir besonnesch séier a sensibel op all Form vu Pressioun – sief et duerch landwirtschaftlech Notzung, urban Entwécklung oder Infrastrukturprojeten.

Zousätzlech ass Lëtzebuerg eent vun de Länner mat der héchster Urbaniséierungs- a Versigelungsdicht an Europa. Dëst féiert dozou, datt vill Gewässer an engem enge Raum agegrenzt sinn, deelweis kanaliséiert goufen oder duerch historesch Entwécklungen net méi hire natierleche Laf hunn. Dës strukturell Belaaschtungen kënnen net kuerzfristeg korrigéiert ginn, well se dacks grondleeënd Adaptatiounen an der Landnotzung, an der Raumplanung oder an der Infrastruktur erfuerderen.

Dës Ausgangslag erkläert, firwat d'Ziler vun der Waasserrahmenrichtlinn an de leschte Joerzénge net erreecht konnte ginn. Gläichzäiteg ënnersträicht si, wéi wichteg et ass, déi aktuell Efforte konsequent weiderzeféieren an ze verstärken. An deem Kontext huet d'Regierung rezent verschidde Initiativen op de Wee bruecht, dorënner d'Strategie fir d'Waasserresilienz souwéi de Renaturéierungsdësch, deen dozou bäidroen soll, d'Ëmsetzung vun de Renaturatiounsprojeten ze beschleunegen an d'Koordinatioun tëscht den Acteuren ze verbessern.

3. Wéi vill onbefrist oder net reegelméisseg iwwerpréift Geneemegunge fir ë. a. d'Entnam vu Grond- an Uewerflächewaasser sinn aktuell a Kraaft, a firwat goufen dës Geneemegunge bis elo net systematesch am Liicht vun de verännerte klimateschen anekologesche Bedéngunge reevaluëiert oder ugepasst?

Et ginn aktuell nach ongeféier 80 Geneemegungen déi keng Frist dra stoen hunn. Dës Geneemegunge sinn am gaangen ugepasst ze ginn. Dës Upassungen huelen Zäit an Usproch, well de verwaltungstechnesche Prozess komplex ass an d'Geneemegungen dacks a Relatioun mat anere geneemegungspflichtege Verännerunge stinn. Dofir kënnen se oft net isoléiert ugepasst ginn.



4. Firwat gouf déi ugekënnegt „feuille de route“ am Beräich vum Gewässerschutz net fristgerecht virgeluecht, a firwat gouf op eng eegestänneg, kloer politesch Strategie verzicht?

D' "Feuille de route" gouf mat an d'Dokument "Wichtige Fragen der Gewässerbewirtschaftung" respektiv „Questions importantes en matière de gestion de l'eau“ ageschafft, an ass säit dem 14. Januar 2026 an der "Consultation du public" déi bis de 15. Juli (grand public) bezéiungsweis de 16. August 2026 (Gemengen a Gemengesyndikater) dauert. D'"Feuille de route" ass erstellt ginn, fir eng Strategie op fachlechtem Niveau virzeschloen, wéi d'Ziler vun der Waasser-Direktiv zu Lëtzebuerg erreicht kënnen ginn. Weider Detailer dozou ginn et ënnert folgendem Link:

[Projet: 4. Bewirtschaftungsplan für die luxemburgischen... | Zesumme Vereinfachen](#)

5. Wéi stellt d'Regierung sécher, datt zukünfteg Moosnamen am Gewässerschutz net erëm a laangwierige Konsultatiouns- a Koordinatiounsprozesser stieche bleiwen, mee verbindlech, transparent an zäitno ëmgëst ginn?

Eng breet Akzeptanz fir d'Wichtigkeet vum Gewässerschutz an e gemeinsamt Verantwortungsgefill vum Staat, de Gemengen an der Gesellschaft si wichteg Voraussetzungen fir d'Ëmsetzung vun de Moosnamen an deem Beräich. An deem Kontext ginn d'Prozeduren applizéiert - déi Transparenz an d'Participatioun vun de betroffenen Acteuren an Ëmweltfroen verlaangen - wéi se vum nationale an internationalem Recht virgesinn sinn.

D'Erfahrung weist, datt e fréit Abanne vun de betroffenen Acteuren dozou bäidréit, d'Akzeptanz fir déi néideg Mesuren ze stäerken an d'Ëmsetzung op laang Siicht ze erliichteren. Och wann esou Konsultatiouns- a Koordinatiounsprozesser an enger éischer Phas Zäit an Usproch huele kënnen, erlaben se et, méiglech Konflikter fristgerecht ze identifizéieren a nohalteg Léisungen auszeschaffen, wat d'Ëmsetzung vun de Moosnamen op Dauer beschleunegt.

Gläichzäiteg setzt d'Regierung sech dofir an, déi néideg Prozeduren esou effizient wéi méiglech ze organiséieren. An deem Kontext goufen och rezent Initiativen op de Wee bruecht, déi schonn ënnert der Fro 2 erwänt goufen.

Lëtzebuerg, den 12. Mäerz 2026
(s.) Serge Wilmes
Minister fir Ëmwelt, Klima a Biodiversitéit